

四庫全書

集部

欽定四庫全書

集部

閩中十子詩卷十七至十九

詳校官中書臣瞿照

助教臣常循覆勘

總校官進士臣朱鈴

校對官中書臣吳紹昱

謄錄監生臣邱卿雲

欽定四庫全書

閩中十子詩卷十七

明 袁表

馬煥 編

王典籍集三

五言律詩

塞下曲

雲中今已平軍士凱歌聲
天地黃塵沒關山碧月明
洗兵秋度磧牧馬夜歸營
多少還家夢中原有弟兄

其二

鐵騎向邊州生隨定遠侯戰餘關月冷兵盡塞塵秋萬
骨纏沙草孤魂集戍樓唯餘忠憤在須獻月支頭

其三

邊城那可論烽火照營門萬竈愁烟合孤城殺氣喧雪
高弓力勁沙凍馬蹄皴百戰蕭條盡何須老獨存

其四

百戰皋蘭北長驅入塞垣陰雲橫敵陣朔雪度營門牧

馬邊塵黑鳴笳隴日昏辛勤看玉劍猶未答君恩

其五

十二羽林郎橫行事朔方陣雲飄戍壘殺氣慘沙場戰
苦陰山黑兵殘落日黃君看射鵬手生繫右賢王

其六

塞垣寒日沒斷草逐霜飛壁月臨朝戟黃塵暗鐵衣檄
傳青海戰陣解玉門圍辛苦沙場北鄉園夢裏歸

其七

欽定四庫全書

懷中十子詩
卷十七

幾戰交河北天山暗雪花橫戈走塞月驅馬躍黃沙窮
寇依深壘殘兵慘暮笳烟塵如未息鄉國不須嗟

其八

軍城飛殺氣絕塞接窮荒隴笛淒邊月天兵肅漢霜鈴
聲沙磧曙馬色玉關涼辛苦防秋卒聞笳益斷腸

金陵送人落第歸江南

風臺寒日莫千里送君還別夢愁京雨鄉心結楚山落
花偏擁棹歸鴈獨臨關應醉家林月青雲好是閒

野望

極浦遙山外
荒城瘴海頭
夕嵐松葉暗
孤嶼鳥聲幽
塞笛飄寒淚
隣謳起暮愁
連天秋草色
歸思日悠悠

送鄭浮丘被詔重赴京師

關河殘葉下
征棹復西遊
遠火臺城暮
微霜禁苑秋
詔書天上出
宣室夜深留
浩蕩論經史
時時近冕旒

送劉逸山還山

天高寒日暮
念念獨還山
綠樹懸心遠
孤雲入望閒
水

流侵石榻葉落擁柴關別後分遙想諸峯杳靄間

梅江夜泊

卸帆依暝渚帶雁宿沙頭戍鼓嚴更漏寒鐘落釣舟霜
明城下水月暗海西樓薄曉啼猿罷蒼蒼遠樹愁

山人入城

行行別翠微迢遞入城扉故舊多零落人烟半是非清
霜寒使馬落日動軍麾薄暮遙鐘起還尋舊路歸

題無諸廟壁

野廟大江干蕭蕭樹色寒斷碑荒草沒畫壁古苔乾龍
去春潮在猿鳴海月殘英雄那可問東逝更漫漫

客中聞子規

關路草淒淒楓林杜宇啼思深湘岸曲聲斷郢雲西故
國春歸盡他鄉客去迷淒涼聽漸近疲馬亦長嘶

春莫田家

野藤垂谷口林徑少人行茅屋先春補沙田候水耕籬
深孤犬吠樹密一鳩鳴花落家僮掃寥寥遠市聲

江樓聞笛

纖月絳楓林晴樓覆夕陰誰家吹鳳管永夜作龍吟楊柳邊頭恨梅花客裏心天明漢江上唯見水雲深

古鏡

匣裏菱花鏡摩挲恨轉深土花浮綠暈秋月閉寒陰漢女曾窺貌秦人已照心蛟龍今剥落徒爾折黃金

夏夜曲

初月照迴廊鳴璫出洞房竹清殘暑氣荷汎小池香雪

腕宮羅潤雲鬟夜月涼庭前有梧葉早晚落銀牀

翡翠

羨爾炎州翠雙棲羽翼微雨香紅玉甯風颺碧羅衣避
鵲藏深竹銜魚上釣磯吳宮矜首飾莫道網羅稀

送人從海城軍

從軍江海上征棹去微茫瘴雨孤城白秋風大野黃旌
旗連蟹舍烟火近鮫房但使封侯貴何須憶故鄉

送人還嶺海

別君滄海上況是暮秋天
亂葉驚離席孤雲逐去船
荔枝瘴雨外柳葉夕陽邊
回首風塵隔相思共渺然

松寺清秋

迢遞青蓮宇雲邊事事幽
松花山路晚鶴夢寺門秋
黃葉僧前落清泉屋上流
所嗟塵累久那得此淹留

秋日遊山寺

荒山殘日晚秋思正淒涼
野鳥啼花逕溪泉溜竹房
鐘聲雲外遠樹色雨中黃
更與詢休輩焚香坐石牀

送衲子遊方

乞食向人烟
心閒處處禪
浮杯江上月
浣衲澗中泉
蜀道峨眉遠
廬山瀑布懸
孤雲自飛去
誰得扣玄玄

聞劉一敦擢監察御史

幾年遊璧水
一旦候金扉
勅賜騎驄馬
人看著錦衣
天連楓陛曉
霜借栢臺威
此際如相憶
毋令尺素稀

輓邢逸民

流落衣冠沒
他鄉幾度春
青山行賣卜
白首坐忘貧
昔

愛林中酒今為草下塵平生數行淚為爾獨沾巾

挽僧

人間那久住隻履獨西歸夜雨虛禪座寒山葬衲衣
棲青草塔猿弔白雲扉從此無期會空令淚欲揮

夜到漁家

渡口集昏鴉綠村逕路賒楓青迷野水竹密暗江沙
遠火人烟絕孤帆月影斜扣門驚犬吠如入子陵家

宮人入道

雨露恩寧薄烟霞恩獨迷
向人披鶴氅無分卷龍衣
女伴愁將別君王夢亦稀
他年青鳥使銜表到金扉

經漂母墓

寂寞淮陰路荒城接楚原
誰能懷漂母曾此飯王孫
孤塚今猶在千金不復論
身慚非國士茲去向何門

昭君怨

淹淚向邊州君恩此日休
身隨沙漠遠心是漢宮愁
雁塞春難度龍堆草易秋
玉容何足貴翻作羽林羞

山路見落花

野花垂嶺口無主亦芳菲
色映林僧帽香隨木客衣
淒涼猿折去零落鳥銜歸
日暮人行絕山風吹更飛

送林山人入城

林棲無外事訪舊入東城
漸失聞猿處多逢結駟行
古榕藏驛舍殘柳拂軍營
薄暮遙鐘起紛紛薜荔情

題王孫挾彈圖

金衣騎小駟迢遞茂陵山
按鵲花邊落鳴鞭柳外還
斷

猿驚雨箭過雁落金丸歸醉瓊樓夕天街雪正寒

秋暮寄山中人

水國催寒早微霜幾夜砧懷君隱居處殘葉亂山深野
鳥無遺跡孤雲不繫心懸知燈火夕閒坐聽猿吟

書江山別意圖送羽人還神樂觀

羽人何處去歸事玉宸君飛珮花間別橫簫鶴上聞過
關闕樹斷絰席楚江分想到齋宮夕園丘候五雲

書谷口雲深圖

連峯轉幽邃竟夕白雲多峽裏非人境春深但女蘿仙
源空翠遠香界斷鐘和鷺鶴飄飄去塵蹤獨奈何

題黃聲玉環清樓

樓虛千嶂合水木澹清華積雨仙源白歸雲鳥道斜
寒衣凌野翠捲幔拂秋霞想見橫經夕蒼藤落數花

梅江送林中州歸龍塘

清時尚不官道在任家寒夜夢梅花帳朝吟首宿盤魚
風吹鬢冷蚌月照衣殘歸去鄉林下橫塘竹萬竿

題陳孟敷耕圖

野情魚鳥邊孤興寄秋田霜降黃花酒山空白日眠雲
根細帙散林杪桔槔懸予亦栖栖者遙知沮溺賢

擬唐儲光義題陸山人樓

愛爾幽棲處樓居水木清松高
清鶴夢竹密助猿吟簾捲山光入
窻虛日色明獨慚官府繫臨眺不勝情

擬唐祖詠江南旅情

支離那可道搖落倍淒然歸夢將
秋月愁心對暮天吳

山蒼靄斷楚樹白雲連日夕涼風動鄉園若箇邊

擬唐祖詠題韓少府水亭

少府愛清暉孤亭近翠微石林娛晚坐池水淨風扉野
鹿銜花過溪雲帶鳥歸何須謝纓冕臨眺始忘機

擬唐祖詠蘇氏別業

忘機依別墅豐水帶南山野竹連孤嶼溪雲伴獨閒鹿
鳴花外去鶴夢雨中還寂寂何人到年年但掩關

擬唐王仲初邊上送故人

羌笛與驪歌相逢柰別何
關河孤夢斷邊地幾人過
沙磧鴻聲小輪臺雪片多
看君馬上去拚取醉顏酡

寒夜擁爐有懷

擁爐寒夜坐寂寞對閒居
凍雪千山白情人萬里餘
京南無過鴈汶上少來書
愁絕殘燈裏橫窗片月虛

送人奉使市馬

使節向宛西承恩出御堤
千金求駿骨萬里得霜蹄
漢武思神驥燕昭重馱驥
歸朝應早計首蓿苑中齊

送僧遊金陵

金陵維帝里宮闕五雲間
師到是何日禪栖若箇山
浣衣天界曉清梵白雲間
早晚門人念東林定裏還

暮春送人還溫陵

斗酒惜分襟溫陵驛路深
關河孤客棹滄海故人心
柳葉迷行旆桐花醉客簪
清源仙洞好知爾日登臨

征婦怨

夫婿遠從征雲中路幾深
作旗餘帛買劍斷釵金被

綉香蘭淺粧奩鳳影沉年年衣上淚隨恨寄寒砧

挽黃蘗大休上人

隻履復還西令人憶我師空門了生滅塵世漫淒其馴
鵲棲新塔靈花落故枝愁來雙樹下空有淚如絲

送人之雲南

雲中路不窮迢遞入烏蒙馬上看山別天涯見月同昆
明波淡淡金齒樹朦朧異域空相憶音書幾日通

送人從溫陵軍

溫陵南海上孤劍獨橫行策馬經花縣看山到柳營明
珠來市舶落葉遍山城長揖嫖姚幙從容論五兵

贈倭僧

參方離日本乞食向中州滄海無行跡浮天但法舟扶
桑孤島曙貝葉舊房秋借問西來意無言坐石頭

送人使重譯

奉詔浮東海魚龍護去舟雙星別鵝鵲幾日過琉球絕
島夷王拜重番使節遊歸朝應早計休起見京樓

梅花戍觀練兵

笳吹動江城將軍練五兵
水搖金甲影風度角弓聲
戎幕斜連海軍麾遶下營
時平嚴武備非欲樹功名

夏日遊碁山寺

載酒空門下林幽暑氣清
半天聞梵語雙壁隱鐘聲
野鳥知禪意孤雲薄世榮
何應謝塵事從此學無生

夏夜泛江因造澹山

畫舫宜涼夜滄江酒氣清
星河分棹影鷗鷺起歌聲
海

曠天低水潮平月到城澹山有佳處遙見蚌珠明

送中州逸人歸龍塘

幽棲何處是積水近柴扉樽酒沙頭別輜軒月下歸竹
深林鳥待村遠故人稀遙想齋居裏狂吟竟落暉

林敬仲以醫往瓜哇國其卒也詩以挽之

君懷秦緩術埋骨向扶桑昔賣人間藥今修地下方魂
飛隨漢使客葬感藩王此日龍門道清猿益斷腸

梅江送林澤中歸嶼南

賣藥偏成隱相逢但布衣
梅江秋外別花嶼雨中歸
遠火千峯夕遙鐘獨鴈飛
自言今白首此去故人稀

客中見新燕

可憐江上燕幾日到烏衣
欲向誰家去多應舊主非
落花深巷小喬木盡梁稀
自笑天涯別秋風想未歸

山居春晚

仙源隔幾塵林館更宜春
葉暗青連雨雲孤白近人
浣衣溪沫綠濯足野苔新
余亦無機者誅茅願卜隣

寒夜宿張藻宅偶賦

旅人眠不安抱劍夜中彈月映花林白霜棲畫壁寒澹
雲孤夢遠流水半生殘想是平原館萋萋草正繁

都門即事

都門閒望處車馬滿香塵禁繞龍池樹鐘殘鳳闕春衣
冠三輔客劍履五侯賓唯有揚雄宅門前草自新

五言排律

美憲僉陳公重修玉融天寶陂

咨訪代宸聰霜威八郡中
褰帷詢潦旱按俗憫年凶
地古瀦防失江流斥鹵通
繡衣親計粟玉節坐鳩工
瘴海秋騰隼關河曉駐驄
已兼修廢墜非但慰疲癯
陂水寒仍綠
陂田歲又豐
永貽饋粥惠寧忘我侯
功利澤思王景恩波感白公
銘心那可報鐫石紀無窮

書黃典幕盤石書室記

盤石隣幽構青山獨下帷
別來鄉望斷心遠宦情微
官舍羈黃綬親闈念綵衣
只應懸魏闕那得戀春暉
故國

銅魚杳音書白鴈稀
家林唯有夢時繞薜蘿歸

林景時雲山圖

驚嶺積蒙茸連山翠幾重險疑金粟洞高訝玉華峯谿
迴雲藏屋林深雨翳鐘客帆秋外小仙珮烏邊逢夢遶
三花樹歌殘五粒松在槃多在澗惆悵獨迷蹤

書滄洲翁家藏高漫士山水圖

草屋滯滄波連峯掃黛蛾路疑盤谷入門訝輞川過野
杖依松桂春衣換薜蘿弄琴魚鳥近卷幔水雲多機靜

都忘世樂成遂永歌紛紛人代裏纓冕欲如何

閩中十子詩卷十七

欽定四庫全書

閩中十子詩卷十八

明 袁表

馬焚 編

王典籍集四

七言律詩

吳城懷古

姑蘇城下刺蘭橈却憶吳王古市朝香輦路邊春寂寂
館娃宮外草蕭蕭千年往事空啼鳥半夜疎鐘自落潮

明發不堪回首處
暝烟秋雨過楓橋

賦得白鴈送人之金陵

燕山榆葉望秋稀
雪羽瀟瀟向楚微
夜雨蘆花看不定
夕陽楓樹見初飛
影隨漢騎營邊落
夢遶胡兒笛裏歸
君到石城霜漸冷
暮雲聲斷欲沾衣

送僧試經赴金陵

奉詔西遊說梵經
秋風應到石頭城
帆飛楚水舟中飯
夢落淮山樹裏行
一錫獨攜空界月
三車遙對廣庭聲

禪心彼此隨緣住塵世空驚遠別情

贈別友人之長沙牧

青年作郡被恩榮五馬瀟瀟向楚城
關外葉飛鄉舍遠湖南草綠吏人迎
嶺雲漠漠空離恨津樹依依若送行
君到長沙應暇日定懷賈誼不勝情

江南春盡偶作

郊外空林帶夕霏海天離思遠依依
流年又逐殘春去華髮空驚兩鬢稀
啼鳥落花孤夢斷白雲芳草舊遊非

家園此日堪惆悵況是天涯客未歸

甲戌歲九日旅懷

客裏淒涼欲暮秋忽逢佳節倍離憂
西風白髮慚烏帽旅舍新寒憶敝裘
千里故人同落葉十年歸夢隔滄洲
別來記得家林賞黃菊花時醉不休

賦野寺殘僧

古寺蕭條絕四隣寺前松栢幾回春
月明下界猶聞磬年老荒山少見人
貝葉舊聽雙樹法衲衣孤坐兩朝身

秋風已爛蒲團草悟得西來意自真

送人貶海南

官亭幾度飲離觴此夕憐君謫遠方馬上看山柳葉暗
津頭沽酒荔枝香秋深嶺表猶多瘴臘盡天南尚少霜
憔悴更須懷直道臨歧何必淚沾裳

送越山隱士

憐君久住在空山寂寂巖扉晝不關落木寒泉青嶂裏
素琴孤鶴白雲間五陵年少何曾到三徑秋來祇獨閒

欲問塵中何事業青雲能有幾人還

題彭韞玉秋山行旅圖

閒門秋晚葉皆飛
征路逢霜客漸稀
獨樹斷猿愁遠騎
隔林殘燒映行衣
西風一飯人烟少
落日千峯夕鳥微
莫向他鄉留滯久
故園山水候君歸

溫陵留別陳方山先輩

溫陵雪後鴈聲寒
芳草青青客未還
千里離情江上月
十年鄉思夢中山
荒城對酒應難別
遠路逢春好是閒

滄海故人零落盡臨岐那忍聽陽關

題郭韓臣家藏趙大年汀渚秋烟卷

大梁公子寫滄洲幾百年中墨尚留芳草祇疑韋曲社
青山多是洛陽秋天邊積靄鴻初斷浦口微霜葉盡流
遙想繁華何事業汴河東去更悠悠

題長樂林生叔達湖山幽處

樓前積水映丹楓清隱林扉趣不窮人影迥臨飛鳥上
書聲還在翠微中青山對酒聞猿斷花嶼橫琴與鶴同

此日長安鳳城內五陵車馬正匆匆

題墨梅

林下花時雪更繁蕭條苔徑共誰看
空香半入孤僧定
霜影全侵鶴夢閒
任着隣歌江上發
恐隨邊笛月中殘
故人天外遙相憶
欲寄南枝愧獨難

和林孔逸見寄之作

淮陰漂泊嘆王孫
生事蕭條一劍存
春草閒堂思舊業
暮雲孤館寄荒村
月明野寺同栖鶴
落葉寒山聽斷猿

傾蓋相逢誰似者且陪歌舞倒芳樽

次韻陳九狂客西岩見寄之作

黃金沙界接岩堯鐘磬微微下九霄禪榻烏啼殘雨過
香臺經盡落花飄心持半偈緣應淺身寄迷途恨獨遙
堪笑此生何佳著期君天路遠相邀

賦磬石秋風送別

磐石蒼蒼入翠微秋風嫋嫋碧蘿飛淒涼半度誰家簌
颯香全吹野客衣孤嶂斷猿聲漸遠荒岡殘樹葉將稀

由來此處堪乘興何事同心又遠違

寒夜宴別陳叔晦得霜字

縣城高館宴離觴共對寒燈別意長孤嶂啼猿驚落葉
誰家殘笛度微霜雲山驛路遙相送魚鳥滄洲舊莫忘
知爾懷人何處是秣陵春樹遠蒼蒼

送林彥賓之淮上省兄

斗酒何須惜路歧此行偏感鵲鴒詩青山野店淮南暮
孤棹微鐘雪後時猿斷曉關驚落葉鴻飛滄海憶連枝

十年官冷英山下幾度看雲悵別離

哭陳叔晦

只道青雲定有期忽聞長逝使人悲
尊前握手難重會客裏論心更與誰
月隱屋梁愁獨夜魂飛淮海夢歸時
青山何處荒墳樹未結吳鉤淚已垂

留別馮公魯兄弟

海國微霜葉已丹玉壺清酒夜漫漫
天寒客路鴻聲曉月落芳江樹影殘
情在不堪分手去興來猶戀故人歡

惠連羣從偏能賦一曲驪歌欲和難

送蔣節菴鍊師還建上

十年江海慕清芬何事逢君又別君
花嶼到來應幾日
茆山歸去獨尋雲
清溪碧水琴邊落
黃葉秋聲鶴上聞
自愧萍蹤無住著
欲將飛佩息塵紛

送林思禮歲貢成均

十年漂泊故人稀
歲晏逢君又遠違
候館暮鴻驚別夢
粵河殘雪照行衣
潮生楚岸風帆夕
樹遶淮山驛路微

此度橋門應早達莫忘書札問林扉

早秋懷林良箴因憶東峰諸上人

正月孤帆別遠津秋風林下忽沾巾他鄉久住愁雙鬢
故國遙看隔幾塵江海又逢初下葉關河同是未歸人
坐來更憶東山賞共對閒僧話夙因

為陳穀駿賦東墅閒居

習靜何須隱翠微一間心遠便忘機
窻臨絕嶼雲來近門掩荒洲客到稀
禾黍露寒秋釀熟蒹葭霜冷夜漁歸

知君悟得幽棲趣却向清時祇布衣

初秋寄清江林崇高先輩

十年滄海寄萍蹤迢遞鄉山思萬重
烏外明河秋一葉天涯涼月夜千峯
心知久別魂應斷生事中年夢亦慵
無限相思何處著越山仙島樹蒙茸

與連川吳彥器夜酌

延陵才子舊知名今日應憐好弟兄
客裏襟期疑是夢天涯萍水況多情
清秋一葉琴中落黃菊孤樽月下傾

傾蓋相逢今又別，不堪江上斷鴻聲。

題玉融鄭可久遊建溪卷

谷口閒耕歲不豐，烟波何處寄行蹤。
孤舟夜泊鐔津渡，九曲朝看玉女峯。
殘葉市橋溪上酒，夕陽蕭寺鳥邊鐘。
遠遊知有懷親夢，應到鄉山第幾重。

逢楊珣感舊

十年萍梗愧相違，我尚飄零子未歸。
江國鴻聲驚別棹，河橋草色映行衣。
他鄉共嘆生涯薄，往事空憐故舊稀。

日暮臨歧倍惆悵
伯勞東去燕西飛

近體留別楊二高隱客三山

別情羈思共何如
迢遞鄉山夢有餘
仙井碧泉思舊業
客庭芳草對離居
關河夜笛鴻飛外
海國春帆雪霽初
愧我萍蹤無住著
知君終食故江魚

贈蔣節庵鍊師

觀門迢遞碧蘿陰
塵跡空懷物外尋
滄海月明人去遠
瑤池秋晚雁來深
孤雲野鶴悠悠別
積水江楓夜夜心

遙想山中多勝事相思時復寄瑤琴

送林彥時謝得圭之建上

才子溪行秋興深仙舟同汎復同心也知王粲偏能賦
誰識嵇康更解琴驛館夜殘明候火市樓霜曉度寒砧
遙憐別後陽春調客裏何人為賞音

暮春邑中與漫士別時滄洲叟命邀不果來

縣城春暮雨紛紛歌罷驪駒厭獨聞蓬鬢相逢俱未達
萍蹤無定又離羣綠蕪客路風將遠黃鳥官亭酒半醺

江上草堂誰倚和杜陵白髮更思君

贈別林伯予召天京蕪東鄭助教董紀善

蓬萊薦剡五雲深才子囊書赴上林
雙澗野僧留別偈七巖山色寄離心
廣文官舍期同飲記室王門待盍簪
明到秣陵應話舊為言江畔獨行吟

寄曾伯剛趙景哲

鴻鴈南飛不寄聲暮雲春樹遠含情
白湖高館何年別青浦孤帆幾日行
香界竹深僧共隱市樓花滿酒同傾

誰憐白髮滄江上閒倚東風聽晚鶯

為樵僧賦閒雲軒

城郭紛紛靜者稀野雲多戀定僧衣依微乍入靈花去
瀟散仍隨法雨飛心寄虛空忘色相身將生滅悟禪機
世人未識孤寒意遙聽經聲禮翠微

挽陳方山先輩

清朝遺老舊參軍幾處移家遠世紛白馬公孫何事業
青袍書記向來聞西風野水山陽笛秋草黃花郭外墳

零落異鄉空有淚憑誰書寄出江雲

歲暮岱峰同龍門漫士留別高景度先輩

龍門歲晚惜同心迢遞龜峯遠更尋殘雪亂山頻對酒
白雲芳草又分簪離堂夜燭猿聲斷別路江楓鴈影深
名下只今多俊逸臨歧高唱比南金

送別林彥時之建上

黃葉紛紛秋滿天故人今夜惜離筵他鄉見月長為客
別路逢霜半在船劍浦綠蕪連晚燒幔亭荒樹帶寒烟

明朝碧水丹山下知爾相思若箇邊

送嚴主簿罷官歸黃州

罷官歸種故侯瓜鄉國蒼茫楚望賒
湘水無情空弔古江離初綠暫還家
鸞栖野棘誰同調玉點青蠅未是瑕
宣室他年思賈誼更持黃紙到長沙

山水圖為造士陳叔能書

屋上羣峰舊隱居澹雲涼月午窗虛
滿庭芳草人稀到半畝黃精手自鋤
積水斷橋寒鳥外夕陽鳴磬夜霜初

泮林莫羨蘇門嘯未許尋山共結廬

題蕭將軍家藏山水圖

十年身被白雲留見盡青山到白頭微雨數峯孤磬夕
半林殘火幾家秋風波不繫袁宏棹魚鳥相懷謝尚遊
聞道將軍戎暇日偏能看畫想滄洲

赴山秋色送秦校尉還觀海軍

稽峯閒望赤城標霞氣蒼茫水霧銷獨樹過江吳地盡
斷雲歸海楚山遙空林木葉驚秋雨極浦鴻聲帶晚潮

相約買舟尋賀老知君終事霍嫖姚

送林叔仁計偕之京

泮林官滿欲趨朝况值金門早見招
粵國青山江上別秦淮秋水鴈邊遙
砧催帝苑霜初落馬度宮城葉漸飄
若得浮丘書信便為言衰老尚漁樵

贈林漢孟赴召天京

七巖峰下舊逃名何事輜軒赴上京
白首相逢萍梗別青山誰共薜蘿情
疎烟夜火丹陽騎遠樹春風白下鶯

想到都門知已在南宮西掖有逢迎

題吳景元江臯雲卧

宦遊西上正紛紛何事江臯獨卧雲夢裏杜蘭隨意綠
鏡中魚鳥向人分潮歸沙館當窻見漁唱楓洲卷幔聞
身外浮名都不繫唯應林叟得逢君

和林孔逸見寄之作

西巖爽氣亂峯頭此地曾陪靜者遊雨霽珠林芳草徧
春深蘭若落花幽清池白石俱禪意野服黃冠半道流

自愧浮生無住著飄然江上一孤舟

贈別劉宗禮還京師

官船一櫂大江流才子還京賦遠遊帆帶夕蕪依御苑
夢隨涼月到家樓長淮鴈影催寒曙近郭砧聲報晚秋
此度金門應早達莫令鄉舍久淹留

送浮丘鄭先輩被命重赴京師

丹陽京口暝烟收幾度勞歌送客遊吳岳曉連秋雨碧
御河寒帶雁聲流衣冠召對金門裏文翰周旋玉案頭

聞道漢庭深顧問承平不遣賈生憂

贈別林孔逸從薊丘軍

越城砧杵亂紛紛多少閒情此送君
別路寒山驚落葉深秋孤鴈忍離羣
薊門日照霜中樹羌笛寒淒塞上雲
聞道漢南曾獨立也將書劍去從軍

寄鳳池故人鍾太

谷口遙鐘半掩門疎燈空館住荒村
梭櫚葉上驚新雨砧杵聲中憶故園
多難未銷豪俠氣長貧難答舊交恩

鳳池月色歌鐘裏應念殘山獨聽猿

書延平王將軍閩山勝覽卷

遠攜兵印鎮南州山水青青馬上遊
玉帳醉看華頂溜
琯弓閒掛劍潭秋
雙溪樹底泉聲合
九曲花邊瘴雨收
自是承平多勝事
七閩應許擅風流

道人延翠軒

山水嬋娟掃黛屏
清暉迢遞到柴扃
雲歸獨樹天邊小
雪罷孤峯鳥外青
寒蘚帶花侵卷幔
野泉流葉近閒庭

浮生只解人間事未得從師種茯苓

寄滄洲狂客

三年憔悴得君憐君上青雲益惘然客裏思鄉何日到
天涯見月幾回圓末期歲晚同攜手預恐新正對別筵
貧賤獨慚無可贈臨岐空憶繞朝鞭

寄劉大

閒宵燈裏夢劉郎夢覺還驚是兩鄉孤館幾回江上月
流年空度鏡中霜青蒲野水林扉靜黃鳥山亭酒甕香

遙想丘園多樂事也應飛札慰離傷

留別黃山周氏兄弟

候館逢霜落葉深更堪憔悴對青衿
荒村野水殘陽路遠樹孤雲故國心
絕地也憐頻送酒情多誰忍更分襟
惠連羣從皆清俊別後相思總解吟

文筆山房為延平郡造士朱員賦

文筆山深隔翠微清暉迢遞映書幃
門臨絕澗逢人少簾卷孤峯見鳥飛
四壁泉聲喧午夢半簷藤影落秋衣

鍾津自昔多才俊詞翰如君世所稀

挽黃山周正卿

與君相識便相知却歎相逢最後時
滄海幾回明月夜黃山終負薜蘿期
秋風野水寒猿斷落葉荒原弔客悲
遙想泉臺今不恨傳家應有鳳毛奇

歐陽明府江上草堂

青原山上草堂開竹杖黃冠日往迴
雨過新潮低卷幔雲連孤嶂落銜杯
聞碁每憶林間榻靜約還思石上苔

佳政祗今人共說未應陶令賦歸來

次韻答黃嗣傑

滿林烏柏飄殘臘獨客關心漫倚樓幾處移家驚落葉
十年歸夢在孤舟青塘野鳥當窻白積雨寒山卷幔幽
何似董湖高隱處朝朝巾舄與同遊

題鄭克曼復睢陽軍手卷

綠髮辭鄉白髮歸遠因行役問庭闈離心又惜連枝別
愁思仍隨獨鴈飛汴河霜落寒砧早梁苑烟空晚樹稀

行到洛陽秋色後柳營長是憶春暉

沙堤燕集次韻答王介軒黃嗣傑

滄洲沙館共懽攜紅燭青樽月易西孤客獨憐萍尚泛
幽期那似鶴同棲霜飄敗葉催殘臘鴈引寒聲入夜溪
何事故人俱斷酒風流佳句若為題

送林思隱之金陵

布衣何事欲朝天螺渚霜空見發船閩樹曉關分楚澤
越城寒火接吳烟白門酒熟誰同醉華館燈孤笑獨眠

闕下名公多舊識莫令歸興後春前

送郁判官秩滿之天官

東膠冠蓋舊稱賢佐郡曾分刺史權
官署到來應似水禮闈今去獨朝天
家臨故苑長洲樹鐘度寒山半夜船
遙想五雲霄漢上從容又賦帝京篇

偕陳叔弢宿崇山蘭若期少尹陳思孝不至賦
近體一首遂書于壁

化城烟磬晚微微何事同心也負期
雙樹焚香栖鳥定

空山對酒白雲隨風飄仙梵清機遠月隱禪枝夜坐遲
明發寄聲賢少尹支公渾似鄭當時

送兵衛從事考滿赴銓

幾年從事總兵機千里輜軒入帝畿驃騎別時多載酒
故人分處尚留衣秦淮遠火春鴻斷長樂微鐘晚雪稀
聞道宦遊西上好莫將尊菜憶東歸

贈張明府入奏

滿縣棠梨春著花郎官書奏覲京華帆開楚水猶逢鴈

道過金壇得到家
紫禁曙鐘雲外聽
白門春酒日邊賒
遙知馬首春歸早
不待青門盡種瓜

高待詔自京回必遜王修撰寄聲相問賦詩以
答之

幾年分教向長沙
此日攜文在帝家
清禁日斜還視草
白門朝退暫看花
玉壺載酒多同醉
青鬢流年想未華
近得故人天上別
感君傳語問烟霞

寄翰林王孟敷兼促皆山樵記

釣鱸橋上惜分簪別後聞君入禁林近道相如能獻賦
誰言賈誼少知音永陽獨樹還家夢魏闕晴雲捧日心
寂寞山林樵采事何時為記比南金

寄贈林志仁博士

麟經獨抱上王畿宮錦新裁博士衣六館夜涼聞漏起
五門天曙退朝歸鳳凰臺上吹簫迥鵲樓前見鴈飛
西掖環林應不遠相逢休道故人稀

寄潘源潤因悼黃山陳平叔

偶因行客問潘郎憶得黃山醉墨堂
斗酒幾迴澆宿草
松門何處閉秋霜尺書不到邊鴻斷
三徑猶存舊業荒
何日遠尋高待詔扁舟能過輞川莊

送陳自立遊古田

孤舟何處興堪攜紅樹千山野水西
別路鴻聲天外小
荒江帆影望中迷到樓殘笛蕙秋聽
向壁新詩倚醉題
我有相思寄流水寒潮唯到白沙谿

謝得圭東嵐秋思圖

海上仙山連翠岑夕嵐孤樹遠沉沉遙天落葉鴻邊盡
絕島殘鐘雨外深烟火數家餘舊業漁樵幾處動歸心
秋來好是尊鱸美知爾看圖憶故林

海天離思送林生復瓊州軍

十年弓騎向邊州暫喜還家又別愁綠酒江亭鄉樹晚
斷雲南鴈海天秋鯨波萬里孤舟遠柳葉千峯片雨收
明到瓊臺霜漸冷知君長夜看吳鉤

初秋留別石田阜陽諸公

相逢那忍別匆匆綠酒清詩興不窮病起異鄉驚暮雨
坐來高館見秋風關河一葉離聲裏江郭千峰醉影中
堪笑人生多是別盍簪能得幾回同

七言排律

夏日遊碁山寺燕集

塵中何處避炎蒸靜愛空王澹愛僧沙界樹涼晴作雨
石渠泉響暗流冰青山載酒隨閒到飛閣觀潮倚醉登
水繞蓮花通寶藏路迴蘭若轉金繩仙人碁局埋幽草

開士禪扉閉古藤荒殿鳥啼時近榻香臺猿卧夜窺燈
老來行止愁無地病後懽攜愧有朋明發別離方外去
何時清興又同乘

閩中十子詩卷十八

欽定四庫全書

閩中十子詩卷十九

明 袁表

馬熒 編

王典籍集五

五言絕句

送劉逸人還山中

落日鷓鴣鳴遙村送獨行峯回看不見望望有餘情

秋陰

寒雲將遠空落葉與飛鴻漢苑秦陵外悲涼是此中

黃葉

帶雨飄階冷隨風著慢涼愁心故宮樹片片落寒霜

聞漁笛

漁人將楚竹吹向月明中莫奏梁州曲金河有斷鴻

古鏡

寶鏡何年鑄龍紋積暗塵非關磨洗倦恐照白頭人

歸鳥

片影雲邊沒孤聲月下微雲霄千萬里何似故巢歸

聽猿

十年聞笛恨此夕更沾襟別淚三聲下孤愁一夜深

柳塘鷺鷥

烟柳拂波聲霜衣汎日明青山對孤影寧倦五湖情

鷓鴣

綠樹殘春外雙飛錦翼齊長沙有遷客莫向雨中啼

訪鄧山人

飛鳥落藤花林幽小選斜白雲深解意相與到君家

踏青

雨晴原草新黃鳥戀行塵年少看花伴如今有幾人

草色

拂拂度林垆霏霏上野亭王孫歸未得空向雨中青

滄洲十咏

綠湖

雲歸蘋葉齊雨積波聲小日夕水容青飛來雙白鳥

蓮塘

荷靜香露圓波深藕根白白
晝誰家兒折花水邊劇

漁艇

白鷗將野櫂蕩漾波光冷水落
秋氣多孤蓬逗霜影

古柳堤

寒潮落沙堰高柳入荒烟
莫把長條折秋來欲繫船

白沙岡

連峯沙似雪迢遞帶滄波
好是殘陽外人稀野鳥多

釣磯

片石翳雲根，隱映波光曉。君看直釣翁，機靜忘魚鳥。

桃花蹊

幽蹊入林深，仙花滿高樹。笑謝滄洲人，來去桃源路。

竹裏軒

露葉凝曉烟，霜枝老苔石。夜半獨行時，清涼滿巾舄。

瓜圃

烟蔓日已長，露花日已滋。為問東陵子，何似青門時。

秋香亭

池淨秋氣寒黃花日朝露卷幔待情人幽香滿林路

鄭山人幽居

林虛孤鳥白花落乳泉香寂寂垂蘿下圖書共一牀

漫興

亂山波上遠片片似修眉山下蘼蕪草春風感別離

苔

要路何曾著閒門積漸多五陵松栢外隨雨上盤陀

度白鶴嶺

鶴嶺翠微分山行半白雲停驂不忍去前路市聲聞

夏夜山中

靜夜月微明脩然萬籟清山禽忽飛起偏傍竹林鳴

水墨枯木

色借蒼苔古春隨野蔓空回看五陵上無樹起秋風

宿鳥

深林織月上嘖嘖獨棲時夜半山風急驚飛過別枝

陳滄洲遊方廣岩不果行

聞說乘舟擢尋源過水西如何雨花處欲往路先迷

王將軍席上賦舊戰袍

先皇親賜錦著向戰場秋銷盡蟠花色將軍更未侯

題鸛鵒

毛衣如浣墨性慧獨能言寂寂空山去休隨衆鳥喧

贈人遊北京

勝遊何太遠飛佩入燕京唯有灤河水東流是舊聲

秋獵

獵馬向風飛
琱弓白錦衣
平明射鵬去
日暮五陵歸

落葉

秋風林下起
亂葉正紛紛
只可醉時看
不堪愁夜聞

俠客

弓騎獵平原
春衣污酒痕
經過無舊主
苔閉孟嘗門

送老兵還鄉

解劍辭邊將
蕭條白髮新
無家也歸去
勝作異鄉塵

初秋尋烏石蘭若

不到禪扉久靈花又早秋白雲飛欲去還被遠公留

為靈武王孟敷題水墨扇頭

飛步凌翠微疎身出林杪孤笑不可攀雲邊數峯小

林良箴溪山秋興扇面

萬葉琴邊落孤雲鳥外微家林好歸去誰厭薜蘿衣

題畫二首

虛舟泊迴潭烟澹水容夕誰解滄浪心山空月下白

微風漾花潭日夕澄天鏡孤櫂信潮回蒼茫海波迥

題葡萄

斗酒別涼州明珠落貝丘似將寒露影添作漢宮秋

題東籬晚香圖

池上凌霜菊別來凡幾秋今朝見圖畫忽起故園愁

書墨菊

翠葉迎晚烟黃花過秋雨我思柴桑人西風但延佇

書黃桂家畫鴿鷄

爭飲恥羣雞高飛謝黃鵠落日陂草寒
萋萋慣幽獨

書墨竹

何處動秋聲撼撼篴簫玉遙夜清不眠懷人在空谷

書海棠禽

裊裊棠梨枝珍禽啄花去一片落長門思君恐遲暮

書梅花雙雀

幾欲銜環去天寒舊路迷梅邊偶相得併作一枝栖

書林景時傲米老

雲雨暗青楓寒山野望中誰將醉時墨遙寄米家風

書陳平叔山水扇頭

鳥沒山意寒漁歸水容夕長嘯望林扉微風動蘿薜

六言絕句

題畫

白首支離傲世青山獨坐忘言長嘯一聲何處斷雲流
水仙源

書扇頭

茅屋垂蘿野烟青山獨樹涼蟬白首豈能忘世桐江未
勝滋泉

題水墨小景二首

白鷗門外孤艇黃葉山中一瓢惆悵青雲舊侶相思不
到漁樵

絕頂閒雲翠微孤峯野杖荆扉惆悵同聲別遠青山斜
日行歸

墨竹

秋影半枝金蕊上池涼露何多誰把玉簫吹斷湘江一夜寒波

書山水圖為希召作

綠樹村邊茆舍暮雲江上漁舟白髮青山歸去玉堂金馬悠悠

七言絕句

送人從北平軍

薊門霜葉正紛紛不見燕臺只見雲君去試看臺下草

何人更憶樂將軍

邊人牧馬圖

草白陰山朔雪晴健兒牧馬近燕城
只今猶有灤河水
日夜東流恨不平

長信宮落花

深宮花謝使人愁片片隨風滿御溝
妾命自憐花共薄
君恩那似水東流

蘭亭懷古二首

曲水飛觴迹漸陳
山中花木幾回春
風流內史歸何處
空使今人憶古人

被禊亭中日漸低
昔人行處草萋萋
多情最是山陰鳥
啼向春風滿會稽

杜鵑花

蜀鳥啼來口血深
染成花萼滿空林
芳魂不逐風吹散
還向天涯碎客心

漁笛

扁舟吹笛度橫塘
欸乃聲中也斷腸
莫道漁郎無別恨
五陵雖好是他鄉

寄山中友

一別青山音問稀
白雲流水思依依
不知老鶴巢邊樹
幾度開花幾度飛

題方壺道人山房二首

洞門一逕入烟霞
九曲溪泉繞洞斜
鐵笛一聲山月冷
獨騎黃鶴問仙家

羽人住處是仙源
蔓草藤花掩洞門
看罷黃庭人不見
唯餘寒溜與霜猿

采蓮曲二首

吳姬日暮隔雲歌
玉腕羅裙采芰荷
畫槳浮空看不見
娟娟微月照湖波

渡頭涼月映羅衣
紅藕香深暑氣微
忽見郎船過江去
一雙鸂鶒背人飛

步虛詞

綠章封事奏瑤京侍女如花弄玉笙
夜半朝回人上鶴
九天環珮月中聲

寒塘曲

玉燕古釵墮寒水曲塘無波深見底
茨姑菱葉爛成泥
唯見芙蓉抱香死

老馬

百戰沙場老此身長楸宮草幾回春
只今棄擲寒郊路
猶自悲鳴戀主人

秋閨

重簾空見月昏黃
絡緯啼來也斷腸
幾度繫書君不答
鴈飛應不到遼陽

聞子規

枝上聲聲怨落暉
居人聞此也沾衣
啼時莫近湘山路
更有長沙客未歸

咏秋風

青蘋江上響瀟瀟
吹得林間萬葉飄
何處淒涼最關別

數株殘柳灞陵橋

挽僧

禪室焚香夜坐同
寺前新塔起悲風
浮雲自是同生滅
空使行人哭遠公

秋山

絕頂風淒萬木黃
露寒雲白色蒼蒼
夜深一片藤蘿月
照見天河水氣涼

秋江送別

江亭相送欲斜暉
黃葉西風動客衣
惆悵孤帆今北去
數行白鴈又南飛

輓道士

雲卧山房秋草青
步虛聲斷月冥冥
淒涼行到空壇上
拾得松間舊鶴翎

秋色

清曉微茫帶遠鴻
晚隨殘照上丹楓
莫將風笛頻吹却
恐落鄉園野樹中

秋荷

西風一夜鏡湖秋
零落殘香逐水流
猶有多情雙翡翠
月明夢逐采蓮舟

野塘翡翠

蘭苕深處好相依
時向沙塘自在飛
莫畏黃金收翠羽
吳王宮裏美人稀

訪僧不遇

寺門深閉對青山
何處浮杯更未還
萬壑千峯人不見

滿林霜葉磬聲閒

賦得草色送同袍友人

色借羅衣綠更新樂游原上幾回春
只今烟雨河橋路愁對青青憶遠人

村居

草徑茅扉帶軟沙隔林雞犬幾人家
青山盡日垂簾坐落盡棕櫚一樹花

春鴈

春風一夜別衡陽
楚水燕山萬里長
莫怪春來便歸去
江南雖好是他鄉

送人之京

送君南浦飲離觴
官柳青青野水香
借問風帆何處落
秣陵城下樹蒼蒼

衰柳

西風昨夜灞陵秋
千樹蕭條帶驛樓
莫道離人空有恨
暮蟬寒雀也關愁

江上聞笛

江上遙聞吹笛聲
荻殘楓冷最關情
斷腸況是涼州曲
何異山陽客裏行

海城秋晚

西風一雁海城頭
羌笛聲中水亂流
楓葉蕭蕭山下
戍樓殘火幾家秋

秋城聞鴈

海國涼秋白鴈聲
行人一騎發邊城
故鄉聞此腸堪斷

况復今朝在客情

客舍聞搗衣

山館猿啼碎客心
惡聞何處響孤砧
數聲驚覺還家夢
一夜挑燈憶故林

同友人尋梵宇

清溪一道出寒林
蓮宇蕭條野樹深
無數青山看不厭
白雲芳草兩同心

村居

楓林野屋半蒼苔寂寂柴扉映竹開啼鳥數聲春自好
五陵年少不曾來

春山對酒

山頂春泉帶雨香數聲啼鳥近壺觴遙憐曲水蘭亭下
寥落風流野草長

新燕

海燕雙飛下柳塘主家臺榭已荒涼玉窻繡戶春雲外
不忍翻飛過別牆

山憲夜雨

深澗垂蘿暗竹房半枝殘燭雨聲涼
蕭條樹葉千峯裏
不獨啼猿斷客腸

老僧

寺前蘿逕盡荒苔
嚮人間再渡杯
階下雙松今百尺
青青曾是少年栽

送人回京口軍

揚子江頭楊柳花
金山對面是京華
行人歸醉軍城酒

北向青門正熟瓜

秋聲

西風初起鴈聲微
千里關河葉盡飛
借問淒涼何處落
五陵松柏遠依依

翡翠

品流曾不讓山雞
珠樹林深碧羽齊
莫近梁王池上去
野烟寒雨草萋萋

山樓對酒

樓前積水映蒼苔
卷幔孤雲落酒杯
更盡一樽秋雨外
故山曾有幾人回

海上送別林崇高先輩二首

海上新晴野水春
烟村花鳥送行塵
十年客路堪惆悵
況復今朝別故人

朝來候館唱離歌
客裏雲山柰別何
忽見陌頭千樹柳
青青那似故情多

東山留別林良箴寓舍二首

鳳林溪上見秋風客裏相看欲轉蓬
鴻鴈蕭蕭霜漸冷
別離況是葉聲中

秋原千樹葉初飛
夜火遙村聽搗衣
莫向他山倍惆悵
家林猶恐未堪歸

野航風雨圖

楓樹蕭蕭野水西
楚天雲雨正淒迷
滄江欲暮風潮急
誰汎扁舟更出溪

為高漫士題方壺傲米小景

暮雲春樹意俱閒
鶴上瑤笙去不還
夢覺屋梁殘月曙
半簾空翠米家山

澹游雨竹

夢入零陵見舊丘
忽聞瑤瑟不勝愁
覺來一片空山雨
散落瀟湘萬葉秋

題方壺清響生琳琅

壺丘仙客寫琳琅
金薤凌風片影涼
夜半蒼梧飛夢到
泠泠瑤瑟滿瀟湘

題陶靖節圖

東帶何須見督郵
寧辭五斗便歸休
秋風幾度黃花酒
醉看飛鴻過石頭

白頭公

竹下棠梨花漸稀
白頭相對語依依
五陵年少多金彈
莫戀殘春忘却飛

書柯丹丘墨竹并古木幽篁

鳳簫吹斷夜初澄
雲葉離離玉露凝
絕勝洞庭涼月曙

數聲瑤瑟度零陵

孤根曾是老風烟直節從教雨露偏
憶得樂游原上路
漢陵千樹也蕭然

題扇頭

醉逐吟鞭任去遲夕陽前路更多岐
上林春物仍堪賞
莫負秋風薜荔期

題畫贈逸人

潮水春深綠到門半林殘火獨家村
荷衣不醉長安月

只那鄉山夜夜猿

題竹木翎毛

蜻蜓轉逐斷香飛
歌鳥殘春聽漸稀
為報琅玕應結子
荒山秋晚鳳凰饑

題梨花斑鳩圖

繡頸欄斑錦翼齊
梁園春樹好飛栖
樂遊年少偏嫌雨
莫向花間自在啼

送樂舞生陳志淳還京

躑躅初紅柳作花
五雲西上是京華
承平欲奏鈞天樂
莫遣仙舟後別家

方壺竹

一鶴東飛出楚雲
手攜湘綠下人羣
幾多金薤琳琅影
散入秋聲夜夜聞

題鄭浮丘家藏方壺水墨風竹

仙墨香銷鳳影殘
上池涼水夜初乾
似將帝子蒼梧瑟
共作秋聲萬葉寒

寄董時貢魯府紀善

秋風黃葉滿貧居
遙憶王門獨曳裾
閩海幾回深寄別
秣陵何事少來書

玉融潘源潤師事黃山陳平叔師歿哀甚以訃
音來告余答詩且寓傷悼之意云

白首愁來薤露歌
黃山烟樹奈愁何
逢人共惜揚雄逝
唯有侯芭淚更多

流水孤雲無見期
屋梁殘月夢中悲
憑將一掬清秋淚

洒向黃山舊墨池

別墅霜空柿葉凋
曲堂雲掩墨香銷
碧蘿野逕黃山裏
誰更登臨望落潮

老去誰堪遠別離
斷雲流水死生期
傷心欲解延陵劍
絳向空林若箇枝

挽方山闡維那

雙樹花飛送斷香
六時經梵轉淒涼
青山何處堪垂淚
殘月疎鐘下影堂

禪心無住復無依何處飄飄隻履歸想是石橋西畔去
寒林空葬舊僧衣

為高廷禮書秋荷鵲鵲圖

雙影蕭蕭鏡水清露荷遙夜落秋聲西風野照荒原夕
誰念孤飛憶弟兄

為高景度題山水

盤石垂蘿野翠分半山啼鳥坐來聞上林春物遙相待
何事將心寄白雲

題林能畫竹

殘粉空香玉露垂
石壇星夜影離離
白頭已遂滋泉釣
凝待秋風寄一枝

送老兵還鄉

曾逐嫖姚出漢關
故鄉寧負老來還
到家莫恨無金印
數畝山田夢亦閒

百戰沙場一劍知
龍鍾雙袖鬢垂絲
扁舟且逐還家興
莫向燕然羨勒碑

二馬圖

紫駟嘶逐玉花驄曾是沙場百戰功今日宛駒無汗血
落花芳草灞陵東

訪羽人不值

仙壇花落正紛紛洞入丹丘半白雲童子開門不相識
言師西去訪茅君

老漁

生事終年在水鄉龍鍾雙袖鬢如霜于今不柰磯頭坐

閒弄兒孫卧草堂

僧房秋夜

古木門巖坐入禪
碧蘿深處一燈懸
蕭蕭天籟千峯月
夢落秋潭午夜泉

美人吹簫

石欄干畔綠蕉陰
紫竹閒吹學鳳吟
寂寂長門春掩靜
商聲那得到君心

送人度分水關

鐵鎖重關路渺漫嶺頭分水夜聲寒君今欲度歸何日
應使行人羨郭丹

羌兒吹笛

雪淨陰山片月孤數聲羌笛起單于不堪吹作梅花調
多少征人滯客途

詠秋風

朝來拂拂洒征衣吹得關河葉漸稀回首茂陵何處在
空餘汾水白雲飛

觀獵

九月淮天百草枯
曉分千騎獵平蕪
彎弓射殺南山豹
歸醉吳姬賣酒壚

書王孫射雁圖

錦袍朱帽綠弓絃
却射飛鴻灞水邊
不識柳林關外路
白狼黃鼠滿秋田

挽方山上人

新塔荒山生野烟
飄然隻履向何天
禪家自是無生滅

欽定四庫全書

關中十子詩
卷十九

三十四

塵世空餘有淚懸

秋園曉步

涼風吹露冷飄飄
菱葉荻蘆色漸凋
莫嘆林塘秋氣早
五陵烟樹亦蕭條

甬東諸葛宗道所作山水小景陳師貢索題其上

蓬萊宮樹晚茸茸
却望青青遠寄蹤
應想舊時猿鶴伴
獨攜歸興度深松

題陳希召外館山水圖

雲木深深少四鄰
綠蘿青壁斷行人
扁舟已是桃花水
更問仙源隔幾塵

題木芙蓉

西風吹袖玉顏酡
搖落襟期柰爾何
一自鴈池清賞後
梁王賓客已無多

雨竹

蒼筤枝上雨冥冥
不似黃陵倚棹聽
憶得小堂清響夜

銀燈猶在酒初醒

山水圖為陳思孝少尹題

孤亭閒坐共忘機
華頂飛泉半夕暉
莫訝小舟頻載酒
山林今日故人稀

酒船一棹鏡湖波
雲掩稽峯半薜蘿
休道謫仙今獨少
山林狂客也無多

題陳衛之雲松軒壁畫李白觀泉

朝別金鑾是醉鄉
香爐飛瀑晚蒼蒼
布衣早悟雲泉興

不到秋霜滿夜郎

題西村陳氏所藏高待詔水墨二幅

松桂春深野鳥啼
綠蘿飛處隱仙梯
瘦筇好是行來晚
雲白山青水滿溪

水國霜空絕鳥飛
亂山寒翠襲行衣
何人獨在林間隱
却向清時更息機

趙景哲效米水墨

濡須不見米南宮
墨客猶傳寶晉風
應有離情何處著

盡隨殘雨上青楓

高廷禮水墨圖

重林茅舍清溪口山人醉倒黃精酒峰頭昨夜春雨多
起拂蘿衣聽寒溜

偶題林本清界畫

雲裏仙臺別望遙三花飛近水精橋秋山未下麻姑鶴
虛負瑤樓品玉簫

錢舜舉翎毛

嬌鳥雙飛戀淺紅
樂遊原上曉嘶驄
別來已少看花伴
空對芳菲落畫中

書李白問月

銀甕閒傾采石春
水天涼月夜無塵
如何翠輦西行處
凝碧池頭照別人

高太史墨竹

乍見琳琅憶澹游
恍然金薤想湖州
誰將史籀臨池法
醉掃湘江幾葉秋

梅花城留別

此會明年未有期，便將輕別作長離。
多情莫學千金水，纔滿空江又落時。

臘日山城見雪初，故人別後會應疎。
沙頭無日無來雁，相問從今祇寄書。

閩中十子詩卷十九

欽定四庫全書

集部

閩中十子詩卷

二十至
二十四

詳校官中書臣瞿照

助教臣常循覆勘

總校官進士臣朱鈐

校對官中書臣吳紹昱

謄錄監生臣邱御雲

欽定四庫全書

閩中十子詩卷二十

明 袁表

馬熒 編

唐觀察集

江上書懷寄周玄林敏

昔年曾共醉蘭舟
明月閒情憶舊遊
獨客荒村空向暮
異鄉多病厭逢秋
殘烟古戍聞寒笛
落日楓林見驛樓
為報別來憔悴甚
漫因尊酒一銷憂

送馮華

古人得志苦不早送君今上秦淮道銀餅醉倒白日斜
黃鸝啼向青春好春風衣繡登玉墀宮花照耀增光輝
千里離心那可道萬言射策人爭希官亭祖餞情何如
酣歌攜手仍躊躇平生交誼寸心在無因割贈雙明珠

古意

洞房掩秋碧落葉銀井闌美人芙蓉服繡作三青鸞鏡
眉怨深黛妝淚淒餘斑惟將明月影雙繫南金環

送友人之金陵

醉別解長劍時人無此心看君青雲去驛騎何駸駸
祖錢不及言徒為進南金得意必殊倫離憂當自任於馬
向江漢千里多寒陰片帆吹霜氛落葉兼鳴砧淮水西
北流相望一何深獻納拜雲闕光輝弁華簪母作兒女
懷將分淚盈襟

送舒從事歸瓊海

年少不得意勸君須盡觴南天七月火雲熱古道蟬鳴

欽定四庫全書

卷二十

槐葉長翩翩匹馬辭鄉縣豈為臨歧淚如霰征旆飄飄
君莫悲戎衣慷慨人皆羨城陰相送白日斜驛道南登
瘴癘賒夢著還尋北堂草醉來忘却東園花行色匆匆
爾何苦世上悠悠何足數歲月休將鏡底過功名好向
刀頭取知君此去壯心橫島夷卉服海塵清粵王臺上
垂楊色黎母山前斷鴈聲君不聞絳灌却因屠酤輩祇
今青史傳其名

寄林七飲

千里一為別思君遠更親雲霄心獨倦江海業長貧古
道迷黃葉寒汀覆白蘋秋風如有待歸計欲垂綸

過黃玄之山居

半生流落意相見但依依卧病看春盡愁心對客稀砌
花飄砌戶畦藥映園扉莫怪頻來此滄洲興不違

訪陳逸人

久別頻相憶知君獨掩扉跡留塵外遠春向夢中歸幽
戶寒苔淺深花暮鳥微近來詩酒興翻與故人違

晚次雪峯寺

微霜落葉度關河古寺清秋掩薜蘿
輕策獨隨飛鳥去
好山偏向夕陽過三花祇苑逢僧少
獨樹空臺積雨多
暫合朋簪耽勝果下方塵土易蹉跎

送王秀才偁之春官

同遊冠蓋正紛紛南國才華獨數君
名列上庠深問道
年猶弱冠解攻文秋齋燈影花深見
畫幔書聲竹外聞
共喜窮經過伏勝誰能壯志忝終軍
扶搖已縱圖南翮

驂囊仍空冀北羣路向吳關飛朔雪朝趨魏闕靄春雲
華裾想接金門侍野服將令社客分何處高吟可相送
冬青葉落岳江濱

次陳山人隱處

獻春始休沐輕策尋幽風烟篠不知路柴扉隱其中
花覆小磴下映流泉紅冥心聽喧鳥解帶投芳叢誰識
此嘉遯心期黃綺同南軒有餘興月出鳴絲桐

鵲鵲行送李敦尋兄於建業

君不見鵲鴝鳥平原索寞無所見可憐此鳥心獨苦蕭
蕭日暮愁霜霰上林風物幾時過羽翼摧殘竟若何顧
影空懸遊子恨聞音尚寄詩人歌舊巢好在清池上秋
水寒雲共來往未學慈烏返哺棲偏同斷鴈驚弦想君
家賢兄心跡奇自言多難久相違此行好似鵲鴝鳥目
望雙雙海上飛

谷大畫屏山水歌

楚客會幽賞清秋思蛾眉忽令見圖畫逸興何離離蒼

梧雲霞更明滅洞庭波濤與天接漁郎舟小往復旋飄
然一棹江中烟望中歷歷漢陽樹鸚鵡洲邊夜來雨松
潭百尺金黛光蓮花萬丈銀屏長堪誇真影不可買有
時飛夢凌蒼蒼我來忘却謝公屐清泉白石遙相望君
不見五岳迢迢幾千仞東攀南緣何時盡縱聞海上採
藥行此中亦有安期名何當洒掃石上月願接仙人吹
玉笙

題雙馬圖

雙龍出御閑僕從解金鞍顧影星眸疾回翔霧鬣寒曉
雲隨立仗落月隱鳴鑾何日孫陽顧光輝畫裏看

山中舊業枉陳山人見訪兼呈林處士

少年書劍愧蹉跎舊業山空掩薜蘿看竹渾忘塵外跡
懷人偏向雪中過乞歸故國青霄遠卧病閒門白髮多
別去為言林處士何時相望一高歌

過賈誼宅

聞君放逐此淹留獻納空懸漢室憂舊宅獨臨湘水遠

遺文曾弔屈原愁青楓極浦烟光晚白鳥空江樹影秋
西望不堪懷古意欲因歸去卧滄洲

閩中十子詩卷二十

欽定四庫全書

閩中十子詩卷二十一

明 袁表

馬熒 編

鄭博士集

望黃鶴樓

黃鶴不可見
高樓霄漢間
仙人度瀛海
黃鶴何時還
長江天際來
驚濤震雪山
欲窮湘漢流
誰啟虎豹關
空餘崔李興
醜酒破愁顏

南風謠

南風吹河河水滿百丈牽舟牛力挽逆流巨浪如登天
牛罷輒重舟不前作書投河訟風伯多助南商疎北客
北客家居南海堦來時南風吹北船武夷清冷過九曲
匡廬疊嶂聞清猿片帆搖搖出京口夜倚淮雲瞻北斗
南風五月經呂梁兩岸青山如馬走今年作客還南遊
南風正爾當船頭風神與我若相識十日五日成淹留
南風何多北風少南北人生如過鳥早晚回船望北歸

直候南風吹到曉

高郵女兒歌

高郵湖水清且幽高郵女兒能盪舟十八梳妝好高髻
二十嫁夫長遠遊青菱鏡破寶釵折翡翠衾寒疊香雪
芳草王孫去不歸蟋蟀啼處秦樓月樓前楊柳飛絮多
門外蛛絲成網羅高郵湖水增夕波高郵女兒將奈何

塞下曲

結髮事專征沙場草作城軍中分虎節天上錫龍旌士

卒全甘苦蠻兵半死生至今西域地還數衛青名

題方明府秋江圖

疾風吹江江倒翻龍伯起舞波連山湘娥錦柱奏清曲
黃竹染淚秋欄斑崑丘鸞鳳五彩翰欲下不下鳴辛酸
瑤池夢回八駿遠麻姑寄信何當還漁郎蕭蕭老風雪
濯足波心弄明月布袍冷著蘆花霜身到南山白銀闕
白銀宮闕迷九霄羣仙降節清夜朝星槎到海不可涉
烏鵲歲度難為橋刺桐花前浯浦小新築茅廬倚江沼

金錢擲卦果有神應駕歸帆逐飛鳥

渭上觀獵

草折渭門霜蕭蕭獵氣黃飛弓秋萬里縱馬日千場鵬
霧藏沙迴鷹風入樹長將軍驕意氣射殺白河狼

送僧遊五臺

浮雲心跡應無住臘月逾淮上五臺寶地近臨天界上
佛香遙度鴈門來山中別友惟留偈雪裏逢人只寄梅
此去安禪高絕處舊遊知不憶天台

伏波祠懷古

荒祠衰草已淒然，猶有邦人話往年。
銅鼓苔生秋雨後，宮牆花落夕陽邊。
竹書早著平蠻策，沙井空餘飲馬泉。
詞客經過休感慨，雲臺麟閣總寒烟。

送友人歸閩

梅福三上書，聲名遍朝野。
宮袍柳色不掛身，歸作吳門抱關者。
丈夫事業貴有為，祿食五鼎徒光輝。
忍貧難受胯下恥，脫穎未見囊中錐。
七閩山水還依舊，故業家饒

一屋投海鷗不入鸞鳳羣雞口猶知勝牛後致書闕下
拜宸旒式微賦歸奚所求既為疏廣東門別却買丹陽
河上舟河流屈曲通南折閩粵關河壯如鐵數程驛路
小肩輿顧食不遑歸夢切過門妻嫂亦下機伯仲問季
歸何遲龐公久種鹿門栗張翰亦採松江薇贈君白接
羅脫君遠遊履都門二月花正飛辟穀之行自今始

六如亭懷古

香魂豔骨瘞崇阿瘴雨蠻烟奈爾何苔上舊碑行客弔

蘿深荒徑野僧過山花寂寂留妝靨堤柳青青想翠蛾
落日平湖風乍起餘情并入采菱歌

竺溪簡朱行人

叢篁疎柳覆沙汀水鳥雙飛度鏡屏山雨來時雲樹白
榜人歸後夜燈青竺溪共是羈人夕銀漢遙連使者星
此地方舟期共賞玉壺春酒莫教醒

寄贈紫陽道士

道人曾是紫陽君冠隱芙蓉帔翦雲寶匣苔深龍劍躍

石壇花落鳳簫聞漫傳駕鶴邀王母幾見籠鵝坐右軍
便欲攜琴遠相訪秋山黃葉落紛紛

關中十子詩卷二十一